





皇朝文紀卷第八

江東

梅鼎祚

纂輯

男士都

校閱

吳

吳王

姬姓名夫差闔閭子為越所滅其先周太王子泰伯逃之荆蠻自號句吳

射越范蠡軍書

初吳王夫差父闔閭與越王句踐戰檣李射傷闔閭且死謂夫差曰必毋忘越夫差擊越敗棲于會稽越行成于吳吳王許而釋之歸句踐與范蠡文種謀所以秦吳吳王遂益驕越伐吳吳王率羣臣遁去達于秦餘杭山越兵至三圍吳范蠡在中行左手提鼓右手操枹而鼓之吳王書其矢而射范蠡之軍大夫種書矢射之

吾聞狡兔以死良犬就烹敵國如滅謀臣必亡今吳病矣大夫何慮乎

文種射報吳書

種字子禽本楚南郢人為宛令

上天蒼蒼若存若亡越君句踐下臣種敢言之昔天以越賜吳吳不肯受是天所反句踐敬天而功既得返國今上天報越之功敬而受之不敢忘也且吳有大過六以至於亡王知之乎有忠臣伍子胥忠諫而身死大過一也公孫聖直說而無功大過二也太宰嚭愚而佞言輕而讒諛妄語恣口聽而用之大過三也夫齊晉無返逆行無僭侈之過而吳伐二國辱君

臣毀社稷大過四也且吳與越同音共律上合星宿下共一理而吳侵伐大過五也昔越親戕吳之前王臯莫大焉而幸伐之不從天命而棄其仇後為大患大過六也越王謹上剗青天敢不如命

吳越春秋剗一作刻

按越絕書作范蠡數吳王曰王有過者五寧知之乎殺忠臣伍子胥公孫聖胥為人先知忠信中斷之入江聖正言直諫身死無功此非大過者二乎夫齊無臯莫居此非大過者三乎夫越王句踐雖東僻亦得繫於天皇之位無臯而王恒使其芻莖秩馬比於奴虜此非大過者四乎太宰嚭讒諛佞諂斷絕王世聽而用之此非大過者五乎吳王曰今日聞命矣又作越王親謂吳王曰昔者上蒼以越賜吳吳不受也夫申胥無罪殺之進讒諛容身之徒殺忠信之士大過者三以至滅亡子知之乎吳王曰知之

伯嚭

楚伯州犁之子父難適吳

遺越大夫文種書

越攻吳吳王謝而告服越王欲許之范蠡大夫種不可太宰嚭遺種書種受書讀之歎曰殺之越與吳同命

狡兔盡則良犬烹敵國滅則謀臣亡大夫何不釋吳

而患越乎韓非子

王孫駱

移公孫聖記

吳王夫差與九郡之師將與齊戰行有日道出于胥門晝卧姑胥之臺夢入章明之宮入門見兩鑿炊而不蒸見兩黑犬嗥以此嗥以南見兩鑿倚吾宮堂見流水湯湯越吾宮牆

見前園橫索生樹桐見後房鍛者扶挾鼓小震召太宰嚭而占之嚭對曰善哉大王與師伐齊也王天悅賜雜繒四十疋復召駱告以所夢駱對有越公弟子公孫聖博聞彊識通於方來之事因移記召之聖得記伏地而泣謁見王正言切諫王母自行使臣下可矣王忿其不祥擊殺之

今日壬午左校司馬王孫駱受教告東掖門亭長公

孫聖吳王晝卧覺寤而心中惆悵也如有悔記到車

馳詣姑胥之臺越絕書

越

范蠡

字少伯楚宛三戶人越上將軍

遺文種書

越既滅吳蠡從入越謂種曰子來去矣越王必將誅子復為書遺種種不信蠡遂辭於王乘扁舟出入三江五湖莫知所適後有讒種於王者賜以屬盧之劍

吾聞天有四時春生冬伐人有盛衰泰終必否知進退存亡而不失其正惟賢人乎蠡雖不才明知進退高鳥以散良弓將藏狡兔已盡良犬就烹夫越王為人長頸鳥喙鷹視狼步可以共患難而不可共處樂可與履危不可與安子若不去將害於子明矣

吳越春秋

同前 史記

越平吳蠡遂去自齊遺大夫種書種見書稱病不朝人或讒種且作亂越王乃賜種劍自殺

蜚鳥盡良弓藏狡兔死走狗烹越王為人長頸鳥喙

可與共患難不可與共樂子何不去

按狡兔數語並載諸書當由紀

撰者傳聞各異爾不應一時數人俱引也

辭越王句踐書

允常子姒姓其先夏后帝少康之庶子封會稽

句踐滅吳稱伯而蠡稱上將軍還反國為書辭句踐乃乘扁舟出三江入五湖人莫知其終所

臣聞主憂臣勞主辱臣死昔者君王辱於會稽所以

不死為此事也今以雪恥臣請從會稽之誅

史記○按吳越

春秋范蠡辭於王曰臣聞主憂臣勞主辱臣死義一也今臣事大王前則無滅未萌之端後則無救已傾之禍雖然臣終欲成君霸國故不辭一死一生臣竊自惟乃使於吳王之慙辱蠡所以不死者誠恐讒於

太宰嚭成伍子胥之事故不敢前死且須臾而生夫
恥辱之心不可以大流汗之愧不可以忍幸賴宗廟
之神靈大王之威德以敗為成斯湯武克夏商而成
王業者定功雪恥臣所以當席日久臣請從斯辭矣
越王曰公住乎分國共之去乎則妻子為
戮蠡曰臣既逝矣妻子何法焉王其勉之

越羣臣祝

吳越春秋曰越王句踐五年與大夫
種范蠡入臣於吳羣臣皆送至浙江
之上臨水祖道軍陣固陵
大夫文種前為祝其詞曰

皇天祐助前沉後揚禍為德根憂為福堂威人者滅

服從者昌王離牽致其後無殃君臣生離感動上皇

衆夫悲哀莫不感傷臣請薄脯酒行二觴

大王德壽無疆無極乾坤受靈神祇輔翼我皇厚之

社祐在側德銷百殃利受其福去彼吳庭來歸越國

越王壽吳王辭

吳越春秋曰吳王既釋越王之
囚大縱酒於文臺為越王設北
面之坐羣臣皆以客禮事之於是范
蠡與越王俱起為吳王壽其詞曰

皇在上令昭下四時并心察慈仁者太王躬親鴻恩

立義行仁九德四塞威服羣臣於乎休哉傳德無極

上感太陽降瑞翼翼大王延壽萬歲長保吳國四海

咸承諸侯賓服觴酒既升永受萬福

大夫種祝越王辭

吳越春秋曰越王既滅吳霸
諸侯置酒文臺羣臣為樂大
夫種進祝
酒其辭曰

皇天祐助我王受福良臣集謀我王之德宗廟輔政

鬼神承翼君不忘臣臣盡其力上天蒼蒼不可掩塞

觴酒二升萬福無極

我王仁賢懷道抱德滅讐破吳不忘返國賞無所悛羣邪杜塞君臣同和福祐千億觴酒二升萬歲難極

楚

楚箴

左傳楚之先若敖蚡冒篳路藍縷以啓山林箴之曰○晉及楚邲之戰欒武子引言

楚未可勝晉師敗績

民生在勤勤則不匱

楚邛仲嬭南和鐘銘

博古圖

惟正月初吉丁亥楚王賸邛仲嬭南和鐘其眉壽無

疆子子孫孫永保用之

按類編云賸送也嬭姊也蓋楚之送女之器謂之南和鐘

者樂縣在南也

巫臣

楚申邑尹稱申公

自晉遺公子嬰齊公子側書

嬰齊字子重側字子反並楚卿

楚圍宋師還子重請取申呂為賞田巫臣不可子反欲取夏姬巫臣止之及共王即位巫臣出奔晉遂取以行子重子反殺巫臣之族而分其室巫臣自晉貽二子書請使吳乃通吳于晉使其子狐庸為行人于吳教吳乘車戰陳吳始伐楚子重子反於是一歲七奔命

爾以讒慝貪恹事君而多殺不辜余必使爾罷於奔

命以死

左傳

黃歇

楚人歷事考烈王為令尹封吳號春申君為李園所殺

上秦昭王書

文紀
一
歇事頃襄王使於秦秦昭王方令白起與韓魏共伐楚而歇適至秦聞其計是時秦已前攻楚取巫黔中之郡拔鄢郢東至竟陵歇恐壹舉兵而滅楚乃上書說昭王昭王曰善乃止白起謝韓魏發使賂楚約爲與國

天下莫彊於秦楚今聞大王欲伐楚此猶兩虎相與鬪兩虎相與鬪而駑犬受其弊不如善楚臣請言其說臣聞物至則反冬夏是也致至則危累棊是也今大國之地徧天下有其二垂此從生民已來萬乘之地未嘗有也先帝文王莊王之身三世不忘接地於齊以絕從親之要今王使盛橋守事於韓盛橋以其地入秦是王不用甲不信威而得百里之地王可謂

能矣王又舉甲而攻魏杜大梁之門舉河內拔燕酸棗虛桃入邢魏之兵雲翔而不敢掾王之功亦多矣王休甲息衆三年而後復之又并蒲衍首垣以臨仁平丘黃濟陽嬰城而魏氏服王又割濮磨之北注齊秦之要絕楚趙之脊天下五合六聚而不敢掾王之威亦單矣王若能持功守威絀攻取之心而肥仁義之地使無後患三王不足四五伯不足六也王若負人徒之衆仗兵革之彊乘毀魏之威而欲以力臣天下之主臣恐其有後患也詩曰靡不有初鮮克有終易曰狐涉水濡其尾此言始之易終之難也何以知

其然也昔智氏見伐趙之利而不知榆次之禍吳見伐齊之便而不知干隧之敗此二國者非無大功也沒利於前而易患於後也吳之信越也從而伐齊既勝齊人於艾陵還爲越王禽三渚之浦智氏之信韓魏也從而伐趙攻晉陽城勝有日矣韓魏叛之殺智伯瑤於鑿臺之下今王妬楚之不毀也而忘毀楚之疆韓魏也臣爲王慮而不取也詩曰大武遠宅而不涉從此觀之楚國援也鄰國敵也詩云趯趯毚兔遇犬獲之他人有心余忖度之今王中道而信韓魏之善王也此正吳之信越也臣聞之敵不可假時不可

失臣恐韓魏卑辭除患而實欲欺大國也何則王無重世之德於韓魏而有累世之怨焉夫韓魏父子兄弟接踵而死於秦者將十世矣本國殘社稷壞宗廟毀剝腹絕腸折頸捐顛首身分離暴骸骨於草澤頭顱僵仆相望於境父子老弱係脰束手爲羣虜者相及於路鬼神孤傷無所血食人民不聊生族類離散流亡爲僕妾者盈滿海內矣故韓魏之不亡秦社稷之憂也今王資之與攻楚不亦過乎且王攻楚將惡出兵王將借路於仇讎之韓魏乎兵出之日而王憂其不返也是王以兵資於仇讎之韓魏也王若不借

路於仇讎之韓魏必攻隨水右壤隨水右壤此皆廣
川大水山林谿谷不食之地也王雖有之不爲得地
是王有毀楚之名而無得地之實也且王攻楚之日
四國必悉起兵以應王秦楚之兵構而不離魏氏將
出而攻留方與銍湖陵碭蕭相故宋必盡齊人南面
攻楚泗上必舉此皆平原四達膏腴之地而使獨攻
王破楚以肥韓魏於中國而勁齊韓魏之疆足以校
於秦齊南以泗水爲境東負海北倚河而無後患天
下之國莫彊於齊魏齊魏得地葆利而詳事下吏一
年之後爲帝未能其於禁王之爲帝有餘矣夫以王

壤土之博人徒之衆兵革之彊壹舉事而樹怨於楚
遲令韓魏歸帝重於齊是王失計也臣爲王慮莫若
善楚秦楚合而爲一以臨韓韓必斂手王施以東山
之險帶以曲河之利韓必爲關內之侯若是而王以
十萬戍鄭梁氏寒心許鄆陵嬰城而上蔡召陵不往
來也知此而魏亦關內侯矣王壹善楚而關內兩萬
乘之主注地於齊齊右壤可拱手而取也王之地一
經兩海要約天下是燕趙無齊楚齊楚無燕趙也然
後危動燕趙直搖齊楚此四國者不待痛而服矣

史記
○戰國策不云書爲說秦王曰物至而反冬夏是也
致至而危累棊是也今大國之地半天下有二垂此

從生民以來萬乘之地未嘗有也先帝文王武王王
 之身三世而不接地於齊以絕從親之要今王使成
 橋守事於韓成橋已北入燕是王不用甲不伸威而
 出百里之地王可謂能矣王又舉甲兵而攻魏杜大
 梁之門舉河內拔燕酸棗虛桃入楚燕之兵雲翔而
 不敢校王之功亦多矣王休甲息衆二年然後復之
 又取蒲衍首垣以臨仁平丘小黃濟陽嬰城而魏氏
 服矣王又割濮磨之北屬之燕斷齊秦之要絕楚魏
 之脊天下五合六聚而不敢救也王之威亦憚矣王
 若能持功守威省攻伐之心而肥仁義之誠使無復
 後患三王不足四五霸不足六也王若負人徒之衆
 恃甲兵之強毀魏氏之威而欲以力臣天下之主臣
 恐有後患詩云靡不有初鮮克有終易曰狐濡其尾
 此言始之易終之難也何以知其然也智氏見伐趙
 之利而不知榆次之禍也吳見伐齊之便而不知于
 隧之敗也此二國者非無大功也沒利於前而易患
 於後也吳之信越也從而伐齊遂攻齊人於艾陵還
 爲越王禽於三江之浦智氏信韓魏從而伐趙攻晉
 陽之城勝有日矣韓魏反之殺智伯瑤於鑿臺之上
 今王妬楚之不毀也而忘毀楚之強魏也臣爲大王

慮而不取詩云大武遠宅不涉從此觀之楚國援也
 鄰國敵也詩云他人有心予忖度之唯楚國免遇犬
 獲之今王中道而信韓魏之善王也此正吳信越也
 臣聞敵不可易時不可失臣恐韓魏之卑辭慮患而
 實欺夫韓國也王既無重世之德於韓魏而有累世之
 怨焉夫韓魏父子兄弟接踵而死於秦者百世矣本
 國殘社稷壞宗廟隳剝腹折頤首身分離暴骨草澤
 頭顱僵仆相望於境父子老弱係虜相隨於路鬼神
 狐祥無所食百姓不聊生族類離散流亡爲臣妾滿
 海內矣韓魏之不出秦社稷之憂也今王之攻楚不
 亦失乎且王攻楚之日則惡出兵王將藉路於仇讎
 之韓魏乎兵出之日而王憂其不反也是王以兵資
 於仇讎之韓魏王若不藉路於仇讎之韓魏必攻隨
 陽右壤此皆廣川大水山林谿谷不食之地王雖有
 之不得爲地是王有毀楚之名無得地之實也且王
 攻楚之日四國必悉起應王秦楚之兵構而不離魏
 氏將出兵而攻留方與銍胡陵碭蕭相故宋必盡齊
 人南面泗水必舉此皆平原四達膏腴之地也而王
 使之獨攻王破楚於肥韓魏於泗爲境東負海北倚
 之強足以校於秦矣而齊南以泗爲境東負海北倚

河而無後患天下之國莫強於齊齊魏得地葆利而詳事下吏一年之後為帝若未能於以禁王之為帝有餘夫以王壤土之博人徒之眾兵革之強而注地於楚詘令韓魏歸帝重於齊是王失計也臣為王慮莫若善楚秦楚合而為一以臨韓韓必授首王襟以山東之險帶以河曲之利韓必為關中之候若是王以十萬戍鄭梁氏寒心許鄆陵嬰城上蔡召陵不往來也如此而魏亦關內侯矣王一善楚而關內二萬乘之主注地於秦齊之右壤可拱手而取也是王之趙也然後危動燕趙持齊楚此四國者不待痛而服矣○注一作任

荀況趙人時人相尊號為荀卿後謂孫卿

謝春申君書

孫子為蘭陵令客說春申君以孫子天下賢人藉之以百里之勢不便於君春申君於是使人謝孫子去之趙趙以為上卿客又說春申君以賢者所在其君未嘗不尊國未嘗不

榮孫子天下賢人也君何辭之於是又使人請孫子於趙孫子為書謝○史記列傳卿仕齊襄王三為祭酒齊人或讒荀卿荀卿乃適楚春申君以為蘭陵令春申君死而荀卿廢因家蘭陵

癘人憐王此不恭之語也雖然不可不審察也此為劫弒死亡之主言也夫人主年少而矜材無法術以知奸則大臣主斷國私以禁誅於己也故弒賢長而立幼弱廢正適而立不義春秋戒之曰楚王子圍聘於鄭未出竟聞王病反問疾遂以冠纓絞王殺之因自立也齊崔杼之妻美莊公通之崔杼帥其君黨而攻莊公莊公請與分國崔杼不許欲自刃於廟崔杼

不許莊公走出踰於外墻射中其股遂殺之而立其弟景公近代所見李兌用趙餓主父於沙丘百日而殺之淖齒用齊擢閔王之筋懸於其廟梁宿夕而歿夫癘雖癰腫胞疾上比前世未至絞纓射股下比近代未至擢筋而餓死也夫劫弑死亡之主也心之憂勞形之困苦必甚於癘矣由此觀之癘雖憐王可也因為賦曰寶珍隨珠不知佩兮禕衣與絲不知異兮閭妹子奢莫知媒兮嫫母求之又甚喜之兮以瞽為明以聾為聰以是為非以吉為凶嗚呼上天曷惟其同詩曰上天甚神無自瘵也戰國策○惟一作謂

同前

韓詩外傳○莊公通之下有脫

鄙語曰癘憐王此不恭之語也雖然不可不審也非比為劫殺死亡之主者也夫人主年少而放無術濫以知姦即大臣以專斷圖私以禁誅於已故捨賢長而立幼弱廢正直而用不善故春秋之志曰楚王之子圍聘於鄭未出境聞王疾返問疾遂以冠纓絞王而殺之因自立齊崔杼之妻美莊公通之崔杼不許欲自刃於廟莊公走出踰於外墻射中其股遂殺而立其弟景公近代所見李兌用趙餓主父於沙丘百日而殺之淖齒用齊擢閔王之筋而懸之於廟宿昔

而殺之夫癘雖癰腫痂疵上比遠世未至絞頸射股也下比近世未至擢筋餓死也夫劫殺死亡之主心之憂勞形之苦痛必甚於癘矣由此觀之癘雖憐王可也因為賦曰璇玉瑤珠不知珮雜布與錦不知異閻娥子都莫之媒嫫母力父是之喜以盲為明以聾為聰以是為非以吉為凶嗚呼上天曷維其同書曰上帝甚蹈無自察焉楊慎風雅逸篇曰按戰國策及後有此賦即荀子書中危詩之少歌也危詩其為春申君作乎危詩云天下不治請陳危詩天地易位四時易鄉列星隕墜旦暮晦盲幽暗登昭日月下藏公正無私反見縱橫志愛公利重樓疏堂無私罪人愍革二兵道德純備讒口將將仁人詘約教暴擅強天下幽險恐失世英螭龍為蟻蟻鳥皇比干

見剗孔子拘匡昭昭乎其知之明也郁郁乎其遇時之不祥也拂乎其欲禮義之大行也閻乎天下之晦盲也皓天不復憂無疆也千秋必反古之常也弟子勉學天不忘也聖人共手時幾將矣與愚亦疑願聞反辭其小歌也念彼遠方何其塞矣仁人詘約暴人衍矣忠臣危殆讒人般矣璇玉瑤珠不知珮也雜布與錦不知異也閻娥子奢莫之媒也嫫母力父是之喜也以盲為明以聾為聰以危為安以吉為凶嗚呼上天曷維其同○春秋後語蘇秦上秦惠王書後亦有韻語後世類書引以為蘇秦之詩云言語相結天下為一合從連橫兵革不藏文士並飭諸侯亂惑萬端俱起不可勝理科條既備民多為態書策稠濁百姓不不足上下相愁民無所聊明言章理甲兵愈起辨言偉服戰攻不息繁稱文辭天下不治舌敝耳聾不見成功行義約信天下不親其書今未有考附此

屈原

卜居

卜居者屈原之所作也屈原履忠貞之性而見疾妬念讒佞之臣承君順非而蒙富

貴已執忠直而身放棄心迷意惑不知所爲
乃往至太卜之家稽問神明決之著龜卜已
居世何所宜行冀聞異策
以定嫌疑故曰卜居也

屈原既放三年不得復見竭智盡忠蔽鄣於讒心煩
意亂不知所從乃往見太卜鄭詹尹曰余有所疑願
因先生決之詹尹乃端策拂龜曰君將何以教之屈
原曰吾寧悃悃款款朴以忠乎將送往勞來斯無窮
乎寧誅鋤草茅以力耕乎將遊大人以成名乎寧正
言不諱以危身乎將從容富貴以媮生乎寧超然高
舉以保真乎將呶訾慄斯喔咿嚅唳以事婦人乎寧
廉潔正直以自清乎將突梯滑稽如脂如韋以絜楹

乎寧昂昂若千里之駒乎將汜汜若水中之鳧乎與
波上下偷以全吾軀乎寧與騏驥抗軛乎將隨鴛鴦馬
之迹乎寧與黃鵠比翼乎將與鷄鶩爭食乎此孰吉
孰凶何去何從世溷濁而不清蟬翼爲重千鈞爲輕
黃鍾毀棄瓦釜雷鳴讒人高張賢士無名于嗟嘿嘿
兮誰知吾之廉貞詹尹乃釋策而謝曰夫尺有所短
寸有所長物有所不足智有所不明數有所不逮神
有所不通用君之心行君之意龜策誠不能知此事

漁父

漁父者屈原之所作也屈原放逐在江湘
之間憂愁嘆吟儀容變易而漁父避世隱
身釣魚江濱欣然自樂時遇屈原川澤之域
怪而問之遂相應答楚人思念屈原因敘其

辭以相傳焉

屈原既放遊於江潭行吟澤畔顏色憔悴形容枯槁
漁父見而問之曰子非三閭大夫與何故至于斯屈
原曰世人皆濁我獨清衆人皆醉我獨醒是以見放
漁父曰聖人不凝滯於萬物而能與世推移世皆濁
何不澁其泥而揚其波衆人皆醉何不舖其糟而歆
其醑何故深思高舉自令放爲屈原曰吾聞之新沐
者必彈冠新浴者必振衣安能以身之察察受物之
汶汶者乎寧赴湘流葬於江魚腹中安能以皓皓之
白蒙世俗之塵埃乎漁父莞爾而笑鼓枻而去乃歌
曰滄浪之水清兮可以濯我纓滄浪之水濁兮可以
濯我足遂去不復與言

橘頌

后皇嘉樹橘徠服兮受命不遷生南國兮深固難徙
更壹志兮綠葉素榮紛其可嘉兮曾枝剌棘圓果搏
兮青黃雜糅文章爛兮精色內白類可任兮紛緼宜
修姱而不醜兮嗟爾幼志有以異兮獨立不遷豈不
可喜兮深固難徙廓其無求兮蘇世獨立橫而不流
兮閉心自慎終不失過兮秉德無私參天地兮願歲
并謝與長友兮淑離不淫梗其有理兮年歲雖少可

師長兮行比伯夷置以為像兮

宋玉郢人為楚大夫

報友人書

玉事楚懷王言友人於王王以為小臣友人讓玉玉報友人書

薑桂因地而生不因地而辛女因媒而嫁不因媒而

親也宋玉集○韓詩外傳宋玉因其友見襄王待之無以異讓其友其友云與此互異亦不言書

赤牘清裁載楚莊姬上王隱書云大魚失水有龍無尾墻欲內崩而王不視楊用脩註此皆叶韻視

音以改亦音已劉勰云文仲謬書于羊裘楚姬託諷于龍尾指此二事也鼎考劉向列女傳處莊姪

傳云楚處莊姪者楚頃襄王之夫人縣邑之女也初頃襄王好臺榭出入不時行年四十不立大子

諫者蔽塞屈原放逐國既殆矣秦乃使張儀間之使其左右謂王南游於唐五百里是時莊姪年十

二以緹竿為幟伏南郊道旁王車至姪舉其幟王使人往問之姪對曰妾縣邑之女也欲言隱事於

王因以幟見王曰子何以戒寡人姪對曰大魚失水有龍無尾墻欲內崩而王不視王曰不知也姪

對曰大魚失水者王離國五百里也樂之於前不思禍之起於後也有龍無尾者年既四十無太子

也國無強輔必且殆也墻欲內崩而王不視者禍亂且成而王不改也因為陳三難五患王曰善命

後車載之立還反國門已閉友者已定王乃發鄂郢之師以擊之乃立姪為夫人按此實面對之辭

本非書也劉勰文心雕龍具諧讖篇未嘗言書王弼州尺牘亦不加辨豈別有據

言書王弼州尺牘亦不加辨豈別有據

皇朝文紀卷第九

江東

梅鼎祚

纂輯

男士都

校閱

燕

惠王

姬姓名樂資昭王子立七年為相成安君公孫操所弒其先武王封同母弟召公奭於燕

遺樂毅書

毅為燕伐齊大破之遂屠七十餘城惟莒即墨未下時田單為即墨令患毅善用兵欲去之昭王又賢不肯聽讒會昭王死惠王立單使人讒之惠王惠王使騎劫代毅毅去之趙單大破燕軍殺騎劫盡復取七十餘城惠王大慙自悔易樂毅以致此禍乃遺毅書毅使人獻書報之

寡人不佞不能奉順君志故君捐國而去寡人不肖明矣敢謁其願而君弗肯聽也故使使者陳愚志君誠諭之語曰仁不輕絕智不輕怨君於先王世之所明知也寡人望有非則君覆蓋之不虞君明棄之也望有過則君教誨之不虞君明臯之也寡人之臯百姓弗聞君微出明怨以棄寡人寡人必有臯矣然恐君之未盡厚矣諺曰厚者不損人以自益仁者不危軀以要名故覆人之邪者厚之行也救人之過者仁之道也世有覆寡人之邪救寡人之過非君惡所望之今君厚受德於先王之成尊輕棄寡人以快心則

覆邪救過難得於君矣且世有厚薄故施異行有得失故患同今寡人任不肖之臯而君有失厚之累於爲君擇無所取國有封疆猶家之有垣墻所以合好覆惡也室不能相和出訟鄰家未爲通計也怨惡未見而明棄之未爲盡厚也寡人雖不肖未如殷紂之亂也君雖未得志未如商容箕子之累也然不內盡寡人明怨於外恐其適足以傷高義而薄於行也非然苟可以成君之高明君之義寡人雖惡名不難受也本以爲明寡人之薄而君不得厚揚寡人之毀而君不得榮是一舉而兩失也義者不毀人以自益况

傷人以自損乎願君無以寡人之不肖累往事之美昔者柳下季爲理於魯三絀而不去或曰可以去矣柳下曰苟與人異惡往而不絀乎猶且絀也寧故國耳柳下季不以絀自累故自前業不忘不以去爲心故遠近無議寡人之皐國人不知而議寡人者徧天下諺曰仁不輕絕知不簡功簡功棄大者仇也輕絕厚利者怨也仇而棄之怨而累之宜在遠者不望之乎君今寡人無皐君豈怨之乎願君捐忿和怒追順先王以復教寡人寡人意君之曰余將快心以成而過不顧先王以明而惡使寡人進不得循初退不得

變過此君所制唯君圖之此寡人之愚志敬以書謁

之此劉向新序所載以爲惠王與樂毅書併有毅報惠王書往復辭旨頗相酬合國策史記並謂燕王喜與樂間先大夫宛溪先生每言文義可疑不似與間者鼎按書有曰君於先王世之所明知也又云今君厚受德於先王之成尊輕棄寡人以快心間之封昌國君於燕要以其父毅故耳何嘗有恩遇綢繆如書所稱述哉則新序之惠王與毅者近是矣且向去太史公亦不遠也

樂毅樂羊之後本魏人爲魏使於燕遂臣燕昭王以爲亞卿封昌國君

報惠王書

臣不肖不能奉承王命以順左右之心恐抵斧鉞之臯以傷先王之明有害足下之義故遁逃自負以不肖之臯而不敢有辭說今王數之以臯恐侍御者不

察先王之所以畜臣之理不白乎臣之所以事先王之心故不敢不以書對臣聞賢聖之君不以祿私親功多者受之不以官隨愛而當者處之故曰察能而授官者成功之君也論行而結交者立名之士也臣以所學觀先王舉錯有高世主之心故假節於魏以身得察於燕先王過舉擢之賓客之中立之羣臣之上不謀父兄以爲亞卿臣自以爲奉令承教可幸無辜故受命而不辭先王命臣曰我有積怨深怒於齊不量輕弱欲以齊爲事臣對曰夫齊者霸王之餘業戰勝之遺事閑於兵革習於戰攻王若欲攻之必與天下圖之圖之莫若徑結趙且淮北宋地楚魏之願也趙若許約楚魏盡力四國攻之齊可大破也王曰善臣乃受命具符節南使趙顧反起兵攻齊以天之道先王之靈河北之地隨先王而舉之濟上之兵受命而勝之輕卒銳兵長驅至齊齊王遁逃走莒僅以身免珠玉貨寶車甲珍器皆收入燕大呂陳於元英故鼎反於歷室齊器設於寧臺薊丘之植植於汶篁五伯以來功業之盛未有及先王者也先王以爲快其志以臣不損令故裂地而封臣使比小國諸侯臣聞賢聖之君功立而不廢故著於春秋蚤知之士名

成而不毀故稱於後世若先王之報怨雪醜夷萬乘之齊收八百年之積及其棄羣臣之日餘令詔後嗣之義法執政任事循法令順庶孽施及萌隸皆可以教後世臣聞善作者不必善成善始者不必善終昔伍子胥說聽於闔閭吳爲遠迹至郢夫差不是也賜之鴟夷沈之江故夫差不計先論之可以立功也沈子胥而不悔子胥不蚤見王之不同量也故入江而不化夫免身而全功以明先王之迹臣之上計也離虧辱之誹墮先王之明臣之大恐也臨不測之臯以幸爲利義之所不敢出也臣聞君子絕交無惡言去臣無惡聲臣雖不肖數奉教於君子臣恐侍御者信親交之說不察疏遠之行故敢以書謝

並新序

樂毅報惠王書

毅爲燕昭王合五國之兵而攻齊下七十餘城盡郡縣之以屬燕三城未下而燕昭王歿惠王卽位用齊人反間疑樂毅而使騎劫代之將樂毅奔趙趙封以爲望諸君齊田單詐騎劫卒敗燕軍復收七十餘城以復齊燕王悔懼趙用樂毅乘燕之敝以伐燕燕王乃使人讓樂毅且謝之曰先王舉國而委將軍將軍爲燕破齊報先王之讐天下莫不振動寡人豈敢一日而忘將軍之功哉會先王棄羣臣寡人新卽位左右誤寡人寡人之使騎劫代將軍爲將軍久暴露於外故召將軍且休計事將軍過聽以與寡人有郤遂捐燕而歸趙將軍自爲計則可矣而亦何以報先王之所以遇

將軍之意乎望諸君乃使人獻書報燕王
○史記惠王復以樂毅子樂間爲昌國君而毅往來復通燕卒於趙先王舉國以下赤牘清裁作惠王與毅書王云樂君報書善矣惠王書亦自委曲懇至足以飾前非而動忠志按國策史記並不言書今存于注

臣不佞不能奉承先王之教以順左右之心恐抵斧質之臯以傷先王之明而又害於足下之義故遁逃奔趙自負以不肖之臯故不敢爲辭說今王使使者數之臯臣恐侍御者之不察先王之所以畜幸臣之理而又不白於臣之所以事先王之心故敢以書對臣聞賢聖之君不以祿私其親功多者授之不以官

隨其愛能當者處之故察能而授官者成功之君也論行而結交者立名之士也臣以所學者觀之先王之舉錯有高世之心故假節於魏王而以身得察於燕先王過舉擢之乎賓客之中而立之乎羣臣之上不謀於父兄而使臣爲亞卿臣自以爲奉令承教可以幸無臯矣故受命而不辭先王命之曰我有積怨深怒於齊不量輕弱而欲以齊爲事臣對曰夫齊霸國之餘教而驟勝之遺事也閑於兵甲習於戰攻王若欲攻之則必舉天下而圖之舉天下而圖之莫徑於結趙矣且又淮北宋地楚魏之所同願也趙若許

約楚趙宋盡力四國攻之齊可大破也先王曰善臣乃口受令具符節南使臣於趙顧反命起兵隨而攻齊以天之道先王之靈河北之地隨先王舉而有之於濟上濟上之軍奉令擊齊大勝之輕卒銳兵長驅至國齊王逃遁走莒僅以身免珠玉財寶車甲珍器盡收入燕大呂陳於元英故鼎反乎曆室齊器設於寧臺薊丘之植植於汶篁自五霸以來功未有及先王者也先王以爲順於其志以臣爲不頓命故裂地而封之使之得比乎小國諸侯臣不佞自以爲奉令承教可以幸無辜矣故受命而弗辭臣聞賢明之君

功立而不廢故著於春秋蚤知之士名成而不毀故稱於後世若先王之報怨雪恥夷萬乘之疆國收入百歲之蓄積及至棄羣臣之日餘令詔後嗣之遺義執政任事之臣所以能循法令順庶孽者施及萌隸皆可以教於後世臣聞善作者不必善成善始者不必善終昔者伍子胥說聽乎闔閭故吳王遠迹至於郢夫差弗是也賜之鴟夷而浮之江故吳王夫差不悟先論之可以立功故沉子胥而弗悔子胥不蚤見主之不同量故入江而不改夫免身全功以明先王之迹者臣之上計也離毀辱之非墮先王之名者臣

之所大恐也臨不測之臯以幸爲利者義之所不敢出也臣聞古之君子交絕不出惡聲忠臣之去也不潔其名臣雖不佞乎數奉教於君子矣恐侍御者之親左右之說而不察疏遠之行也故敢以書報惟君之留意焉

戰國策

同前

史記

臣不佞不能奉承王命以順左右之心恐傷先王之明有害足下之義故遁逃走趙今足下使人數之以罪臣恐侍御者不察先王之所以畜幸臣之理又不白臣之所以事先王之心故敢以書對臣聞賢聖之

君不以祿私親其功多者賞之其能當者處之故察能而授官者成功之君也論行而結交者立名之士也臣竊觀先王之舉也見有高世主之心故假節於魏以身得察於燕先王過舉厠之賓客之中立之群臣之上不謀父兄以爲亞卿臣竊不自知自以爲奉今承教可幸無臯故受令而不辭先王命之曰我有積怨深怒於齊不量輕弱而欲以齊爲事臣曰夫齊霸國之餘業而最勝之遺事也練於兵甲習於戰攻王若欲伐之必與天下圖之與天下圖之莫若結於趙且又淮北宋地楚魏之所欲也趙若許而約四國

攻之齊可大破也先王以爲然具符節南使臣於趙
顧反命起兵擊齊以天之道先王之靈河北之地隨
先王而舉之濟上濟上之軍受命擊齊大敗齊人輕
卒銳兵長驅至國齊王遁而走莒僅以身免珠玉財
寶車甲珍器盡收入于燕齊器設于寧臺大呂陳于
元英故鼎反乎磨室薊丘之植植於汶篁自五伯以
來功未有及先王者也先王以爲慊於志故裂地而
封之使得比小國諸侯臣竊不自知自以爲奉命承
教可幸無辜是以受命不辭臣聞賢聖之君功立而
不廢故著於春秋蚤知之士名成而不毀故稱於後

世若先王之報怨雪恥夷萬乘之疆國收八百歲之
畜積及至棄羣臣之日餘教未衰執政任事之臣脩
法令慎庶孽施及乎萌隸皆可以教後世臣聞之善
作者不必善成善始者不必善終昔伍子胥說聽於
闔閭而吳王遠迹至郢夫差弗是也賜之鴟夷而浮
之江吳王不寤先論之可以立功故沉子胥而不悔
子胥不蚤見主之不同量是以至于入江而不化夫
免身立功以明先王之迹臣之上計也離毀辱之誹
謗墮先王之名臣之所大恐也臨不測之罪以幸爲
利義之所不敢出也臣聞古之君子交絕不出惡聲

忠臣去國不絜其名臣雖不佞數奉教於君子矣恐侍御者之親左右之說不察疏遠之行故敢獻書以

聞惟君王之留意焉

夏侯玄曰觀樂生遺惠王書其庶乎知幾合道以禮始終者與

燕王喜

惠王曾孫孝王子立三十三年為秦所虜而燕亡

遺樂間書

惠王復以樂毅子樂間為昌國君居燕三十年燕王喜用其相栗腹計欲攻趙而問於間問曰趙四戰之國其民習兵伐之不可燕王不聽遂伐趙趙使廉頗擊之大破燕軍禽栗復間入趙趙遂圍燕燕重割地與趙和王乃遺間書間怨不用其計卒留趙不報

寡人不佞不能奉順君意故君捐國而去則寡人之不肖明矣敢端其願而君不肯聽故使使者陳愚意

君試論之語曰仁不輕絕智不輕怨君之於先王也

世之所明知也寡人望有非則君掩蓋之不虞君之

明臯之也望有過則君教誨之不虞君之明棄之也

且寡人之臯國人莫不知天下莫不聞君微出明怨

以棄寡人寡人必有臯矣雖然恐君之未盡厚也諺

曰厚者不毀人以自益也仁者不危人以要名故掩

人之邪者厚人之行也救人之過者仁者之道也世

有掩寡人之邪救寡人之過非君孰望之今君厚受

位於先王以成尊輕棄寡人以快心則掩邪救過難

得於君矣且世有薄而故厚施行有失而故惠用今

使寡人任不肖之臯而君有失厚之累於爲君擇之也無所取之國之有封疆家之有垣牆所以合好掩惡也室不能相和出語鄰家未爲通計也怨惡未見而明棄之未爲盡厚也寡人雖不肖乎未如殷紂之亂也君雖不得意乎未如商容箕子之累也然則不內蓋寡人而明怨於外恐其適足以傷於高而薄於行也非然也苟可以明君之義成君之高雖任惡名不難受也本欲以爲明寡人之薄而君不得厚揚寡人之辱而君不得榮此一舉而兩失也義者不虧人以自益况傷人以自損乎君無以寡人不肖累往事

之美昔者柳下惠吏於魯三黜而不去或謂之曰可以去柳下惠曰苟與人之異惡往而不黜乎猶且黜乎寧於故國爾柳下惠不以三黜自累故前業不忘不以去爲心故遠近無議今寡人之臯國人未知而議寡人者遍天下語曰論不脩心議不累物仁不輕絕智不簡功簡棄大功者輟也輕絕厚利者怨也輟而棄之怨而累之宜在遠者不望之乎君也今以寡人無臯君豈怨之乎願君捐怨追惟先王復以教寡人意君曰余且慝心以成而過不顧先王以明而惡使寡人進不得修功退不得改過君之所揣也唯君

圖之此寡人之愚意也敬以書謁之策戰國

同前 史記

紂之時箕子不用犯諫不怠以冀其聽商容不達身
祇辱焉以冀其變及民志不入獄囚自出然後二子
退隱故紂負桀暴之累二子不失忠聖之名何者其
憂患之盡矣今寡人雖愚不若紂之暴也燕民雖亂
不若殷之甚也室有語不相盡以告鄰里二者寡人
不為君取也

無名氏

獻燕王噲書 噲易王子立三年讓國子
之及三年齊伐燕噲死

或獻書燕果以兵南合三晉三晉三年與楚三晉
攻秦不勝而還○陳師道曰此當是昭王時

燕主而不能自恃不惡卑名以事彊事彊可以令國
安長久萬世之善計也以事彊而不可以為萬世則
不如合弱將柰何合弱而不能如一此臣之所以為
山東苦也比日之魚不相得則不能行故古人稱之
以其合兩而如一也今山東合弱而不能如一是山
東之智不如魚也又譬如車士之引車也三人不能
行索二人五人而車因行矣今山東三國弱而不能
敵秦索二國因能勝秦矣然而山東不知相索者智
故不如車士矣胡與越人言語不相知志意不相通

同舟而凌波至其相救助如一也今山東之相與也
如同舟而濟秦之兵至不能相救助如一智又不如
胡越之人矣三物者人之所能為也山東主遂不悟
此臣之所為山東苦也願大王之熟慮之也山東相
合之主者不惡卑名之國者可長存之卒者出土以
戍韓梁之西邊此燕之上計也不急為此國必危矣
王必大憂今韓梁趙三國已合矣秦見三晉之堅也
必南伐楚趙見秦之伐楚也必攻燕物固有勢異而
患同者秦之伐韓故中山亡今秦之伐楚燕必亡臣
竊為王計不如以兵南合三晉約戍韓梁之西邊山

東不能堅為此此必皆亡

戰國策○鮑彪云此三物
喻從之精者也故雖子曾

庸主亦能感動惜乎言猶在耳而諸
侯之心已變矣此豈非天亡之哉

蘇代

東周雒陽人蘇秦弟與兄
厲皆以壽死名顯諸侯

自宋遺昭王書

代與燕相子之婚乃使代侍質子於齊齊使
代報燕因言齊王之不信其臣不能霸以動
燕專任子之已而讓位燕大亂立昭王代歸
齊復之宋齊攻宋急代遺昭王書昭王善其
書乃召代與謀伐齊
竟破齊潛王出走

夫列在萬乘而寄質於齊名卑而權輕奉齊助之伐
宋民勞而實費破宋殘楚淮北肥大齊讎彊而國弱
也此三者皆國之大敗也而足下行之將欲以除害

取信於齊也而齊未加信於足下而忌燕也愈甚矣然則足下之事齊也失所爲矣夫民勞而實費又無尺寸之功破宋肥讎而世負其禍矣足下以宋加淮北疆萬乘之國也而齊并之是益一齊也北夷方七百里加之以魯衛此所謂疆萬乘之國也而齊并之是益二齊也夫一齊之疆而燕猶不能支也今乃以三齊臨燕其禍必大矣雖然臣聞智者之舉事也轉禍而爲福因敗而成功者也齊人紫敗素也而賈十倍越王句踐棲於會稽而後殘吳霸天下此皆轉禍而爲福因敗而成功者也今王若欲轉禍而爲福因

敗而成功乎則莫如遙霸齊而厚尊之使之盟於周室盡焚天下之秦符約曰夫上計破秦其次長賓客秦秦挾賓客以待破秦王必患之秦五世以結諸侯今爲齊下秦王之志苟得窮齊不憚以一國都爲功然而王何不使布衣之人以窮齊之說說秦謂秦王曰燕趙破宋肥齊尊齊而爲之下者燕趙非利之也弗利而勢爲之者何也以不信秦王也今王何不使可以信者接收燕趙今涇陽君若高陵君先於燕趙秦有變因以爲質則燕趙信秦矣秦爲西帝趙爲中帝燕爲北帝立爲三帝而令諸侯韓魏不聽則秦伐

之齊不聽則燕趙伐之天下孰敢不聽天下服聽因驅韓魏以攻齊曰必反宋地而歸楚之淮北燕趙之所同利也竝立三帝燕趙之所同願也夫實得所利名得所願則燕趙之棄齊也猶釋敝躡今王之不收燕趙則齊霸必成矣諸侯戴齊而王獨弗從也是國伐也諸侯戴齊而王從之是名卑也王不收燕趙名卑而國危王收燕趙名尊而國寧夫去尊寧而就卑危智者不爲也秦王聞若說也必如刺心然則王何不務使智士以若此言說秦秦伐齊必矣夫取秦上交也伐齊正利也尊上交務正利聖王之事也

戰國策

秦王者秦昭王涇陽高陵並昭王母弟

同前 史記

夫列在萬乘而寄質於齊名卑而權輕奉萬乘助齊伐宋民勞而實費夫破宋殘楚淮肥大齊讎疆而國害此三者皆國之大敗也然且王行之者將以取信於齊也齊加不信於王而忌燕愈甚是王之計過矣夫以宋加之淮北疆萬乘之國也而齊并之是益一齊也北夷方七百里加以魯衛疆萬乘之國也而齊并之是益二齊也夫一齊之疆燕猶狼顧而不能支今以三齊臨燕其禍必大矣雖然智者舉事因

禍爲福轉敗爲功齊紫敗素也而賈十倍越王句踐
棲於會稽復殘疆吳而霸天下此皆因禍爲福轉敗
爲功者也今王若欲因禍爲福轉敗爲功則莫若挑
霸齊而尊之使使盟于周室焚秦符曰其大上計破
秦其次必長賓之秦挾賓以待破秦王必患之秦三
世伐諸侯今爲齊下秦王之志苟得窮齊不憚以國
爲功然則王何不使辯士以此言說齊王曰燕趙破
宋肥齊尊之爲之下者燕趙非利之也燕趙不利而
勢爲之者以不信秦王也然則王何不使可信者接
收燕趙令涇陽君高陵君先於燕趙秦有變因以爲
質則燕趙信秦秦爲西帝燕爲北帝趙爲中帝立三
帝以今於天下韓魏不聽則秦伐之齊不聽則燕趙
伐之天下孰敢不聽天下服聽因驅韓魏以伐齊曰
必反宋地歸楚淮北反宋地歸楚淮北燕趙之所利
也竝立三帝燕趙之所願也夫實得所利尊得所願
燕趙棄齊如脫躡矣今不收燕趙齊霸必成諸侯贊
齊而王不從是國伐也諸侯贊齊而王從之是名卑
也今收燕趙國安而名尊不收燕趙國危而名卑夫
去尊安而取危卑智者不爲也秦王聞若說必若刺
心然則王何不使辯士以此苦言說秦秦必取齊必

伐矣夫取秦厚交也伐齊正利也尊厚交務正利聖王之事也

自齊獻昭王書

代在齊而或有疑之於王者故以書自白

臣之行也固知將有口事故獻御書而行曰臣貴於齊燕大夫將不信臣臣賤將輕臣臣用將多望於臣齊有不善將歸罪於臣天下不攻齊將曰善爲齊謀天下攻齊將與齊兼質臣臣之所處重卵也王謂臣曰吾必不聽衆口與讒言吾信女也猶列眉也上可以得用於齊次可以得信於下苟無死女無不爲也

以女自信可也與之言曰去燕之齊可也期於成事而已臣受令以任齊及五年齊數出兵未嘗謀燕齊趙之交一合一離燕不與齊謀趙則與趙謀齊齊之信燕也至於虛北地行其兵今王信田伐與參去疾之言且攻齊使齊犬馬而不言燕今王又使慶令臣曰吾欲用所善王苟欲用所善王欲用之則臣請爲王事之王欲醜臣專任所善則臣請歸醜事臣苟得

見則盈願

戰國策○所處重卵一作所重處重留○陸深云燕昭卽位志復齊讐非一日矣樂毅至燕在十七年後又十年始合五國以破齊方其

患齊之疆志未逞也蘇代之徒爲之間齊離燕之交激秦之怒勸之以伐宋驕其兵而罷其師齊卒以亡代有力焉而世不數何也蓋毅之爲燕約結信義服

人卒用以此勝何暇乎代之為哉代之輕詐反覆效用於燕亦昭王之賢明有以御之非所以成功也

太子丹燕王喜子

與麴武書麴武史記作鞠武

丹質于秦逃歸怨秦欲報之與其傅麴武書○史記丹因武得交田光先王而田光言其友荆軻於丹使刺秦王不中以死秦伐燕燕王喜斬太子丹以獻然秦竟滅燕

丹不肖生于僻陋之國長于不毛之地未曾得覩君子雅訓欲有所陳幸垂覽之丹聞丈夫之道節義廉恥受辱以生也真正所羞之見却以窺其節故有刎喉不顧據鼎不避者斯豈樂死而忘生哉其心有所守也今秦王反戾天常虎狼其行遇丹無禮諸侯最

甚每念之痛入骨髓計燕國之衆不能敵之曠年相守力固不足欲收天下勇士集海內英雄破國空藏以奉養之重幣甘辭以市於秦秦貪我賂而信我辭則一劍之任當千萬之師須臾之間可解丹萬世之恥若其不然令丹生無日於天地死懷恨於九泉必令諸侯無以為歎易水之北未知誰有此蓋抑亦大夫恥也謹遣書願熟思之燕丹子○真正二句無以為歎並有脫誤

代

代王嘉本趙公子率其宗數百人之代自立為代王與燕合兵燕亡代亦為秦滅

遺燕王喜書

秦所以猶追燕急者以太子丹故也今王誠殺丹獻
之秦王秦王必解而社稷幸得血食

史記

皇霸文紀卷第十

江東

梅鼎祚

纂輯

男士都

校閱

趙

趙鞅

文子武之子諡簡子趙正卿與秦共祖造父事周穆王賜以趙城因氏烈侯籍始為諸侯

與子伯魯無恤書

趙簡子大子名伯魯小子名無恤簡子自為一書牘親自表之與二子使誦之居三年簡子坐清臺之上問二書所在伯魯忘其表令誦不能得無恤出其書於袖令誦習焉乃出伯魯而立無恤是為襄子

節用聽聰敬賢勿慢使能勿賤

韓詩外傳

武靈王

名雍肅侯子立二十七年傳位少子何自稱主父

番禺勒跡

趙主父令工施鉤梯而緣番禺刻疎人跡其上而勒之銘曰○文心雕龍

趙靈勒跡於番禺此後世題名之始

主父嘗遊於此

程本

晉人字子華聚徒著書自號程子趙聘不起去之齊館於晏氏更題其書曰子華子今傳

者有劉向校定序漢藝文隋唐宋志悉無其目吳兢李淑二家亦不載必後世文士依托也

答趙簡子書

子華子違趙燭過典廣門之左曰彼庶人也而傲侮公上法所弗寘也簡子曰而士以兵之燭過至苓塞子華子行五日矣簡子悔之使使者於齊而使董安于寓書以招之子華子再拜肅使者于庭而授之辭簡子得書召無恤而戒之曰燭過小人也實使我獲罪於

本吾且死汝必反之

主君之亡臣某不能束脩越在諸侯以為主君憂臣

聞之物局於所甘士局於所守主君之亡臣不佞而

有四方之志其敢以為執事者之所辱夫丘陵崇而

穴成於上狐狸藏矣谿谷深而淵成於下魚鼈安矣

松柏茂而陰成於林塗之人則蔭矣主君之亡臣不

佞實有隱衷惟執事者昭明其所存如日月之升以

光燭於晉國將四海之士重繭狎至以承主君之令

聞夫豈惟亡臣亡臣雖復野死以寘溝叻其敢忘主

君之賜惟執事者財幸焉

子華子

蘇厲秦弟見兄遂亦皆學游說

上惠文王書

惠文王名何武靈王少子趙至武靈稱王趙收天下且以伐齊厲為齊上書說趙王○按此齊閔王時

臣聞古之賢君德行非施於海內也教順慈愛非布於萬民也祭祀時享非當於鬼神也甘露降風雨時農夫登年穀豐盈衆人善之而賢主惡之今足下功力非數痛加於秦國而怨毒積惡非曾深陵於韓也臣竊外聞大臣及下吏之議皆言王前專據以秦為愛趙而憎韓臣竊以事觀之秦豈得愛趙而憎韓哉欲亡韓吞兩周之地故以韓為餌先出聲於天下欲

鄰國聞而觀之也恐其事不成故出兵以佯示趙魏恐天下之驚覺故微伐韓以貳之恐天下疑已故出質以為信聲德於與國而實伐空韓臣竊觀其圖之也議秦以謀計必出於是且夫說士之計皆曰韓亡三川魏滅晉國是韓未窮而禍及於趙且物固有勢異而患同者又有勢同而患異者昔者楚人久伐而中山亡今燕盡韓之河南距沙丘而至鉅鹿之界三百里距於扞關至於榆中五百里秦盡韓魏之上黨則地與國都邦屬而壤挈者七百里秦以三軍彊弩坐羊腸之上即地去邯鄲二十里且秦以三軍攻王

之上黨而危其北則勾注之西非王之有也今踰勾注禁常山而守三百里通於唐曲逆此代馬胡駒不東而崑山之玉不出也此三寶者又非王之有也今從於疆秦與之伐齊臣恐其禍出於是矣五國之主嘗合橫而謀伐趙三分趙國壤地著之盤盂屬之讎柞五國之兵有日矣齊乃西師以禁秦國使秦發令素服而聽反温軹高平於魏反三公什清於趙此王之明知也夫齊事趙宜為上交今乃以邱臯取伐臣恐其後事王不敢自必也今王收齊天下必以王為得齊齊危社稷以事王天下必重王然則齊義王以

天下就之下至齊慕王以天下收之是一世之命制

於王已臣願大王深與左右羣臣卒計而重謀先事

成慮而熟圖之也

戰國策○東一作畜讎柞酬酢同逆一作遇原作吾危一作抱公字

疑誤安定有三水朔方有三封渤海有三戶皆近趙○齊乃西師以下齊原並作韓○按策多為韓言乃趙籍擊韓而厲為韓止之者其間事實皆明指韓而首云伐齊殊不合決有誤而史一切以韓為齊抑馬遷之所改歟然趙伐韓事亦不知在何時其文及地名亦多舛異不同強為之說鮑專據史文輒改大不然也

同前 史記

惠文王十六年秦與趙擊齊齊人患之故厲為齊遺趙王書趙乃輒謝秦不擊齊

臣聞古之賢君其德行非布於海內也教順非洽於

民人也祭祀時享非數常於鬼神也甘露降時雨至年穀豐熟民不疾疫衆人善之然而賢主圖之今足下之賢行功力非數加於秦也怨毒積怒非素深於齊也秦趙與國以彊徵兵於韓秦誠愛趙乎其實憎齊乎物之甚者賢主察之秦非愛趙而憎齊也欲亡韓而吞二周故以齊餒天下恐事之不合故出兵以劫魏趙恐天下畏己也故出質以爲信恐天下亟反也故徵兵於韓以威之聲以德與國而實伐空韓臣以秦計爲必出於此夫物固有勢異而患同者楚久伐而中山亡今齊久伐而韓必亡破齊王與六國分

其利也亡韓秦獨擅之收二周西取祭器秦獨私之賦田計功王之獲利孰與秦多說士之計曰韓亡三川魏亡晉國市朝未變而禍已及矣燕盡齊之北地去沙丘鉅鹿歛三百里韓之上黨去邯鄲百里燕秦謀王之河山間三百里而通矣秦之上郡近挺關至於榆中者千五百里秦以三郡攻王之上黨羊腸之西句注之南非王有已踰句注斬常山而守之三百里而通於燕代馬胡犬不東下昆山之玉不出此三寶者亦非王有已王久伐齊從彊秦攻韓其禍必至於此願王孰慮之且齊之所以伐者以事王也天下

屬行以謀王也燕齊之約成而兵出有日矣五國三分王之地齊倍五國之約而殉王之患西兵以禁疆秦秦廢帝請服反高平根柔於魏反涇分先俞於趙齊之事王宜為上佼而今乃抵臯臣恐天下後事王者之不敢自必也願王孰計之也今王母與天下攻齊天下必以王為義齊抱社稷而厚事王天下必盡重王義王以天下善秦秦暴王以天下禁之是一世之名寵制於王也

諒毅

為趙獻秦昭王書

秦攻魏取寧邑諸侯皆賀趙孝成王使賀三反不得通憂之諒毅者辯士也親受命而往至秦獻書昭王乃見使者曰趙豹平原君數欺弄寡人趙能殺此二人則可毅曰趙豹平原君親寡君之母弟也猶大王之有葉陽涇陽君也大王以孝治聞於天下今使臣受大王之令以還報敝邑之君不敢不行無乃傷葉陽涇陽君之心乎秦王曰諾勿使從政

大王廣地寧邑諸侯皆賀敝邑寡君亦竊嘉之不敢寧居使下臣奉其幣物三至王廷而使不得通使君若無臯願大王無絕其權若使者有罪願得請之

策

戰國

無名氏

為齊獻孝成王書

王名丹惠文王子

臣一見而能令王坐而天下致名實而臣竊怪王之
不試見臣而窮臣也羣臣必多以臣爲不能者故王
重見臣也以臣爲不能者非他欲用王之兵者也則
交有所偏者也非然則智不足者也非然則欲以天
下之重恐王而取行者也臣以齊循事王王能亡燕
能亡韓魏能攻秦能孤秦臣以齊致尊名於王天下
孰敢不致尊名於王臣以齊致地於王天下孰敢不
致地於王臣以齊爲王求名於燕及韓魏孰敢辭之
臣之能也其前可見已齊先重王故天下盡重王王
無齊天下必盡輕王也秦之彊以無齊故重王燕韓

魏自以無齊故重王今王無齊獨安能無重天下故
勸王無齊者非智不足則不忠者也非然則欲用王
之兵成其私者也非然則欲輕王以天下之重取行
於王者也非然則位尊而能卑者也願王之熟慮無
齊之利害也

戰國策

山陽侯天使

神

遺趙無卹書

智伯攻襄子襄子奔保晉陽原過從後至王澤見三人自帶以下不可見與原過竹二節莫通曰爲我以是遺趙無卹襄子齋三日親自剖竹有朱書襄子再拜受三神之令於是趙北有代南并知氏祀三神于百邑使原過主霍大山祠祀至武靈王竟胡服騎射闢地

千
里

趙無卹余霍泰山山陽侯天使也三月丙戌余將使女反滅知氏女亦立我百邑余將賜女林胡之地至於後世且有仇王亦黑龍面而鳥喙鬚麋髭頰大膺大胷脩下而馮左衽界乘奄有河宗至于休溷諸貉南伐晉別北滅黑姑史記

同前風俗通

無卹余霍太山陽侯大吏三月丙戌余將使汝及滅智氏亦立我三百邑余將使賜若林胡之地至于後世且有仇王赤黑龍面鳥屬鬚眉髭髯大膺大胷脩

下而馮上左任介乘奄有河室至于休溷諸貉南伐

晉別北滅黑姑

魏

無名氏

為魏獻秦昭王書魏哀王時

魏畏秦攻移禍於楚故飾為之辭秦果南攻藍田鄢郢○藍田秦地疑衍

臣竊聞大王之謀出事於梁謀恐不出於計矣願大王之熟計之也梁者山東之要也有虵於此擊其尾其首救擊其首其尾救擊其中身首尾皆救今梁者天下之脊也夫秦攻梁者是示天下要斷山東之脊

也是山東首尾皆救中身之時也山東見亡必恐恐必大合山東尚彊臣見秦之必大憂可立而待也臣竊爲大王計不如南出事於南方其兵弱天下不必能救地可廣大國可富兵可彊主可尊王不聞湯之伐桀乎試之弱密須氏以爲武教得密須氏而湯知服桀矣今秦欲與山東爲讎不先以弱爲武教兵必大挫國必大憂

戰國策○鮑彪云征伐先後理正應爾故司馬錯爲秦議以伐蜀爲先藝祖欲平太原諸國亦先平蜀

曲沃負

上哀王書

襄王子姬姓畢公高之後畢萬事晉封于魏至斯命爲諸侯惠王筮稱王

負大夫如耳母也哀王爲太子政納妃而美王將自納焉負因款門上書王召入對以此毀貞女之行亂男子之別王善其言遂還太子妃而賞負三十鍾

曲沃之老婦也心有所懷願以聞於王

列女傳

范痤

獻安釐王書

王名圉昭王子

痤爲魏相趙孝成王用虞卿計使人以百里之地請殺痤於魏而欲移從於趙魏王許諾使司徒執痤而未殺也痤獻書魏王又遺其後相信陵君書信陵君遽言之王而出之

臣聞趙王以百里之地請殺痤之身夫殺無罪范痤薄故也而得百里之地大利也臣竊爲大王美之雖然而有一焉百里之地不可得而死者不可復生也

則王必為天下笑矣臣竊以為與其以死人市不若以生人市便也

戰國策○史記云王使吏捕之圍而未殺痤因上屋騎危謂使者曰與其

以死痤市不如以生痤市有如痤死趙不予王地則王將柰何故不若與先定割地然後殺痤魏王曰善

遺信陵君無忌書無忌安釐王異母弟封信陵君相魏

夫趙魏敵戰之國也趙王以咫尺之書來而魏王輕為之殺無罪之痤痤雖不肖故魏之免相也嘗以魏之故得罪於趙夫國無用臣外雖得地勢不能守然今能守魏者莫如君矣王聽趙殺痤之後彊秦襲趙之欲倍趙之割則君將何以止之此君之累也

王云襲趙之欲倍趙之割此語有以深中信陵之畏矣故免

戰國策○

同前史記○說苑亦載

痤故魏之免相也趙以地殺痤而魏王聽之有如彊秦亦將襲趙之欲則君且柰何

田齊

閔王名地宣王子燕樂殺下齊王出走莒楚使淖齒殺之其先陳厲公子完奔齊為工正食采

于田至田和為諸侯

遺楚懷王書王名熊槐威王子

潛王欲為從長惡楚之與秦合使使遺楚王書楚業已欲和於秦見齊王書猶豫不決下其議羣臣羣臣或言和秦或曰聽齊昭睢議當合齊以善韓懷王許之

寡人患楚之不察於尊名也今秦惠王死武王立張

儀走魏樗里疾公孫衍用而楚事秦夫樗里疾善乎
韓而公孫衍善乎魏楚必事秦韓魏恐必因二人求
合於秦則燕趙亦宜事秦四國爭事秦則楚為郡縣
矣王何不與寡人并力收韓魏燕趙與為從而尊周
室以案兵息民令於天下莫敢不樂聽則王名成矣
王率諸侯竝伐破秦必矣王取武關蜀漢之地私吳
越之富而擅江海之利韓魏割上黨西薄函谷則楚
之疆百萬也且王欺於張儀亡地漢中兵鏗藍田天
下莫不代王懷怒今乃欲先事秦願大王孰計之

謝孟嘗君書

史記

閔王使孟嘗君就國於薛客馮煖西游於梁
謂梁王曰齊放其大臣孟嘗君於諸侯諸侯
先迎之者富而兵彊於是梁王虛上位以故
相為上將軍遣使者黃金千斤車百乘往聘
孟嘗君梁使三反孟嘗君固辭不往也齊王
聞之君臣恐懼遣太傅賈黃金千斤文車二
服劍一封書一謝孟嘗君煖
復誠孟嘗君請立廟於薛

寡人不祥被於宗廟之崇沈於諂諛之臣開臯於君
寡人不足為也願君顧先王之宗廟姑反國統萬人
乎

戰國策

楚姬匝盤銘

十七字
博古

齊侯作楚姬寶盤其萬年子子孫孫永保用

楚姬匝
銘曰齊

侯作楚姬寶匝此其盤也楚與齊從親在潛
王時也博古即以齊侯為潛王亦恐未然

田文

靖郭君嬰庶子威王孫嗣立于薛是為孟嘗君

遺秦穰侯魏冉書

齊湣王時孟嘗君歸老于薛秦亡將呂禮相齊欲困蘇代代謂孟嘗君曰周最于齊至厚也而齊王逐之而聽親弗相呂禮者欲取秦也齊秦合則親弗與呂禮重矣有用齊秦必輕君君不如急北兵趨趙以和秦魏收周最以厚行且反齊王之信又禁天下之變齊無秦則天下集齊親弗必走則齊王孰與為其國也於是孟嘗君從之而呂禮嫉害於孟嘗君孟嘗君懼乃遺穰侯書穰侯言于秦昭王伐齊而呂禮亡齊滅宋欲去孟嘗君奔相魏

吾聞秦欲以呂禮收齊齊天下之彊國也子必輕矣齊秦相取以臨三晉禮必併相矣是子通齊以重呂禮也若齊免於天下之兵其讎子必深矣子不如勸

秦王伐齊齊破吾請以所得封子齊破秦畏晉之彊秦必重子以取晉晉國敝於齊而畏秦晉必重子以取秦是子破齊以為功挾晉以為重是子破齊定封秦晉交重子若齊不破呂禮復用子必大窮

史記○戰國策

薛公為魏謂穰侯曰文聞秦王欲以呂禮收齊以濟天下若必輕矣齊秦相聚以臨三晉禮必并相之是君收齊以重呂禮也齊免於天下之兵其讎君必深君不如勸秦王令敝邑卒攻齊之事齊破文請以所得封君齊破晉彊秦王畏晉之彊也必重君以取晉齊子晉敝邑而不能支秦晉必重君以事秦是君破齊以為功採晉以為重也破齊定封而秦晉皆重君若齊不破呂禮復用子必大窮矣○鮑云此時文未相魏其言為魏意親之矣

魯仲連

齊人好奇偉倣儻之畫策而不肯仕宦任職

遺燕將書

燕攻齊取七十餘城惟莒卽墨未下齊田單以卽墨破燕殺騎劫初燕將攻下聊城人或讒之燕燕將懼遂保守聊城不敢歸田單攻之歲餘士卒多死而聊城不下魯連乃爲書約之矢以射城中燕將因罷兵到鞞而去故解齊國之圍故百姓之死仲連之說也○史記燕將見魯連書泣三日欲歸燕已有隙恐誅欲降齊所殺虜於齊甚衆恐復見辱乃自殺

吾聞之智者不倍時而棄利勇士不怯死而滅名忠臣不先身而後君今公行一朝之忿不顧燕王之無臣非忠也殺身亡聊城而威不信於齊非勇也功廢名滅後世無稱非智也故智者不再計勇士不怯死

今歿生榮辱尊卑貴賤此其一時也願公之詳計而無與俗同也且楚攻南陽魏攻平陸齊無南面之心以爲亡南陽之害不若得濟北之利故定計而堅守之今秦人下兵魏不敢東面橫秦之勢合則楚國之形危且棄南陽斷右壤存濟北計必爲之今楚魏交退燕救不至齊無天下之規與聊城共據碁年之敝卽臣見公之不能得也齊必決之於聊城公無再計彼燕國大亂君臣過計上下迷惑栗腹以十萬之衆五折於外萬乘之國被圍於趙壤削主困爲天下戮公聞之乎今燕王方寒心獨立大臣不足恃國敝旤

多民心無所歸今公又以聊城之民距全齊之兵朞年不解是墨翟之守也食人炊骨士無反北之心此孫臏吳起之兵也能已見於天下矣故爲公計不如罷兵休士全車甲歸報燕王燕王必喜士民見公如見父母交遊攘臂而議於世功業可明矣上輔孤主以制群臣下養百姓以資說士矯國革俗於天下功名可立也意者亦捐燕棄世東游於齊乎請裂地定封富比陶衛世世稱寡與齊久存此亦一計也二者顯名厚實也願公熟計而審處一也且吾聞效小節者不能行大威惡小恥者不能立榮名昔管仲射桓公中鉤篡也遺公子糾而不能死怯也束縛桎梏辱身也此三行者鄉里不通也世主不臣也使管仲終窮抑幽囚而不出慙恥而不見窮年沒壽不免爲辱賤行矣然管子并三行之過據齊國之政一匡天下九合諸侯爲五霸首名高天下光照鄰國曹沫爲魯君將三戰三北而喪地千里使曹子之足不離陳計不顧後出必死而不生則不免爲敗軍禽將曹子以敗軍禽將非勇也功廢名滅後世無稱非智也故去三北之恥退而與魯君計也曹子以爲遭齊桓公有天下朝諸侯曹子以一劔之任劫桓公於壇位之上

顏色不變而辭氣不悖三戰之所喪一朝而反之天下震動驚駭威信吳楚傳名後世若此二公者非不能行小節死小恥也以為殺身絕世功名不立非智也故去忿恚之心而成終身之名除感忿之恥而立累世之功故業與三王爭流名與天壤相敝也公其

圖之戰國策○鮑彪云彪按此書以齊閔為宣王蘇

錄之誤至於此章引栗腹之事說聊城之將蓋好事者聞約矢之說惜其書不存擬為之以補亡不暇檢校也陳師道正曰魯仲連說燕將下聊城史不著年其書引栗腹之敗此事在其後且田單即墨起七十餘城即復為齊不聞聊城尚為燕守以齊之事勢豈有舍之三十餘年而不攻單之兵力三十餘年而不城下歟今日攻之歲餘不下者獨莒即墨單縱反問亦

言二城而燕世家書聊莒即墨策亦有三城不下之此誤因聊城不下而引與莒即墨亂也夫仲連之言正謂栗腹敗燕國亂聊城孤守一方併攻勢將必拔其言初不涉潛襄昭惠之際所謂楚攻南陽魏攻平陸閔王時楚取淮北單復齊後蓋已復之不聞楚魏交攻之事二事必在後也燕將被讒懼誅連書亦無此意此因樂毅而說也史又稱燕將得書自殺單遂屠聊城尤非事實齊前所殺燕將惟騎劫爾不聞其他此因騎劫而說也○余祭酒有丁云按聊城事在田單復齊後或當長平之前此書乃引栗腹事故鮑彪疑為後人補撰

同前 史記

吾聞之智者不倍時而棄利勇士不怯死而滅名忠臣不先身而後君今公行一朝之忿不顧燕王之無臣非忠也殺身亡聊城而威不信於齊非勇也功敗

名滅後世無稱焉非智也三者世主不臣說士不載故智者不再計勇士不怯死今死生勞辱貴賤尊卑此時不再至願公詳計而無與俗同且楚攻齊之南陽魏攻平陸而齊無南面之心以爲亡南陽之害小不如得濟北之利大故定計審處之今秦人下兵魏不敢東面衡秦之勢成楚國之形危齊棄南陽斷右壤定濟北計猶且爲之也且夫齊之必決於聊城公勿再計今楚魏交退於齊而燕救不至以全齊之兵無天下之規與聊城共據期年之敝則臣見公之不能得也且燕國大亂君臣失計上下迷惑粟腹以十

萬之衆五折於外以萬乘之國被圍於趙壤削圭困爲天下僂笑國敝而禍多民無所歸心今公又以敝聊之民距全齊之兵是墨翟之守也食人炊骨士無反外之心是孫臏之兵也能見於天下雖然爲公計者不如全車甲以報於燕車甲全而歸燕燕王必喜身全而歸於國士民如見父母交游攘臂而議於世功業可明上輔孤主以制羣臣下養百姓以資說士矯國更俗功名可立也亡意亦捐燕棄世東游於齊乎裂地定封富比乎陶衛世世稱孤與齊久存又一計也此兩計者顯名厚實也願公詳計而審處一焉

且吾聞之規小節者不能成榮名惡小恥者不能立大功昔者管夷吾射桓公中其鉤篡也遺公子糾不能死怯也束縛桎梏辱也若此三行者世主不臣而鄉里不通鄉使管子幽囚而不出身死而不反於齊則亦名不免爲辱人賤行矣臧獲且羞與之同名矣况世俗乎故管子不恥身在縲紲之中而恥天下之不治不恥不死公子糾而恥威之不信於諸侯故兼三行之過而爲五霸首名高天下而光燭鄰國曹子爲魯將三戰三北而亡地五百里鄉使曹子計不反顧議不還踵刎頸而死則亦名不免爲敗軍禽將矣

曹子弃三北之恥而退與魯君計桓公朝天下會諸侯曹子以一劔之任枝桓公之心於壇坫之上顏色不變辭氣不悖三戰之所亡一朝而復之天下振動諸侯驚駭威加吳越若此二士者非不能成小廉而行小節也以爲殺身忘軀絕世滅後功名不立非智也故去忿忿之怨立終身之名棄忿悁之節定累世之功是以業與三王爭流而名與天壤相弊也願公擇一而行之

卽墨富豪

遺燕將書

田單齊將也燕軍大破齊國單守卽墨知士卒可用乃身操版鍤與士卒分功妻妾編行伍之間盡散飲食饗士令甲卒皆伏使老弱女子乘城遺約降于燕燕軍皆呼萬歲田單又收人金得千鎰令卽墨富豪遺燕將書燕將大喜許之燕軍由此益懈田單出軍擊大之敗

卽墨卽降願無掠虜吾家族妻妾令安堵田單

齊人誦史記荀卿趙人年五十始來遊學於齊

于髡久與處時有得善言故齊人頌○七畧作齊語

天口駢談天衍雕龍頭炙轂過髡史記無天口駢三字○駢田駢也駢

衍所言五德終始天地廣大故曰談天駢頭脩衍之文飭若雕鏤龍文故曰雕龍過字作髡髡者車之盛膏器也炙之雖盡猶有餘流言淳于髡智不盡炙如髡也

田者祝史記淳于髡傳齊威王使髡于諸請兵禦楚齊金百斤車馬十駟髡仰天大笑

冠纓索絕王曰先生少之乎髡曰臣從東方來見道傍有禳田者操豚蹄酒一盃而祝曰云云臣見其所持者狹而所欲者奢故笑之

甌窶滿篝汚邪滿車五穀蕃熟穰穰滿家篝叶斤敷反家叶攻

乎反○篝籠也汚邪下地田也

蠃螺者宜禾汚邪者滿車五穀蕃熟穰穰滿家荀子

此事其辭全異蠃螺高地也

系

皇朝卷十

十八



